



20. maj 2026

UPA2026/120

**Uunga siunnersuut: Inuiattut erinarsuutitsinni marluusuni sorleq pisortatigoortumik atorneqassanersoq nutaamilluunniit taarserneqartariaqarnersoq pillugu apeqquteqaat aallaavigalugu oqallinnissamik siunnersuut.**

*(Inatsisartuni ilaasortaq Aqqalu C. Jeremiassen, Atassut)*

Nunatsinni inuiattut erinarsuutit sorleq atorneqartassanersoq imaluunniit allamik taarserneqassanersut pillugit apeqquteqaat aallaavigalugu oqallisissiamik siunnersuuteqartoq Inatsisartunut ilaasortap Aqqalu C. Jeremiassenip siunnersuuteqarneranut Siumut sinnerlugu qujanaq.

Inuiattut erinarsuuterput pillugu maanna maani inersuarmi oqallinneq nutaajunngilaq. Tassami maanna qulingiluassaa (9) maani inersuarmi qinikkat assigiinngitsut oqallisigisarsimagaat Inatsisartut nittartagaani takuneqarsinnaapput.

Ukiut ingerlaneranni Inatsisartut kiisalu inuiaqatigiinni oqallisigineqartuartarsimavoq. Tamanna nammineq takussutissiivoq, pineqartoq taamaallaat aalajangiinissamut tunngasuunngitsoq, kisianni inuiaqatigiinni ataatsimoornermut, oqaluttuarisaanermut kiisalu inuiaqatigiittut qanoq ataatsimoornerput pillugu eqqarsaatigineqartariaqartoq.

Siumumiit siusinnerusukkut taamatut suliaqarnermi oqaatigisarparput, nunani ataasiakkaani kinaassutsimut ilisarnaatit pisortatigit aalajangiussinertut ataasiinnarmik pineqarsinnaanngitsut. Oqaluttuarisaanermut, innuttaasunit atorneqarnermit kiisalu ataatsimoornermik misigissutsimit aallaaveqarput.

Ullutsinni uppersarneqarsinnaavoq, "Nunarput utoqqarsuanngoravit" aammalu "Nuna asiillasooq" tamarmik nunatta erinarsuutaattut atorneqartartut. Tamanna inuiaqatigiinni pissusissamisoortumik ineriartortoq malugineqarsinnaavoq, tamannali assortorneqarsinnaanngilaq.

Ilutigisaanik akuersaarparput, ersarissumik isumaqatigiissuteqannginneq ilaatigut innuttaasunut pisortatigullu aqqissuussinerni paasiuminaatsitsilersinnaasoq. Erinarsuutit assigiinngitsumik atorneqaraangata ataatsimoorititsinermut sunniutaat annikillisinnaavoq.

Siumumiit isumaqarpugut taamaattumillu pisariaqartoq nunatsinni kinaassutsimut ilisarnaatit pillugit ataatsimoorussamik paasinninneq ersarinnerusoq ineriartortinneqassasoq. Tamanna isumaqanngilaq oqaluttuarisaanermut imaluunniit ullumikkut atorneqartunut akuersaannginneq, kisianni nunatsinni ataatsimoorfiusinnaasumik ersarissumik sinaakkusiinissaq pisariaqartoq.

Naalakkersuisut oqaatigisaat akuersaarparput, tassalu innuttaasut peqataatinneqarnissaat pisariaqartoq – kiisalu pisariaqartitsineq malillugu innuttaasut taasisinneqarnissaat eqqarsaatigineqarsinnaasoq. Tamanna pitsaasuuvoq aammalu inuiaqatigiinni peqataatitsineq tunngavigalugu aalajangiisarneq naapertorpoq.



Siumumiit ilaatigut isumaqarpugut pingaaruteqartoq, inuiaqatigiinni pingaarutilimmik kinaassutsimut tunngasunik aalajangiinerit innuttaasut akornanni aallaaveqassasut. Erinarsuut nunatsinni innuttaasunut ataasiinnarmik eqqarsaatiginagu eqqarsaatigisariaqarpoq, kisianni aamma ataatsimoornermut tunngavoq. Taamaattumik innuttaasut toqqaannartumik peqataatinneqarnissaat pitsaasumik aqutissaasinnaavoq.

Ilutigitillugu erseqqissassavarput, allannguisoqassappat oqaluttuarisaanermut ataqqinnineq tunngavigalugu ingerlanneqartariaqartoq. Erinarsuutit atuuttut tassaapput nunatsinni oqaluttuarisaanerup immikkoortui pingaarutillit, taamaattumillu allannguinerit eqqarsaatigilluarneqassapput inuiaqatigiinnullu akuersaarneqarsinnaasumik ingerlanneqassallutik.

Aamma oqaatsit assigiinngitsut pillugit eqqarsaatersuutit soqutiginarput. Nunarput oqaatsinik assigiinngitsunik inissaqartitsivoq, tamannalu ataatsimoornermik eqqarsarnermi ilanngunneqarsinnaavoq. Taamaattumik ataatsimoorussamik erinarsuummik eqqarsarnermi oqaatsit pillugit eqqarsarneq pingaaruteqarpoq, kisianni aamma ataatsimoorutitsisinnaanermut aammalu ilisimaneqartuunermut naleqqussarneqarnissaa pingaaruteqarpoq.

Naggataatigut Siumumiit oqaatigissavarput, immikkoortitsineq imaluunniit siornatigut pisimasut aammalu siunissamut eqqarsarneq immikkoortillugit isigineqassanngitsut. Ataatsimoorussamik kinaassutsip nukittorsarnissaa periarfissaavoq pingaarutilik, pingaartumik nunatsinni inuiaqatigiinni ineriartortumi.

Taamaattumik Naalakkersuisut Inatsisartullu suleqatigiillutik suliaq ingerlaqqissappassuk Siumumiit tikilluaqqarput, inuiaqatigiinnut peqataatitsisumik aammalu innuttaasut akornanni ataatsimoorutimik akuersaarneqarsinnaasumik aalajangiisoqarnissaa anguniarlugu. Siumup 2017-imi oqallinnermi akissuteqaatini matumuuna ersarissumik kaammattuutigeqqiinnassavaa. Tunngaviusumik inatsimmik suliaqarnermut atatillugu una qulequtaq ilanngullugu suliarineqarli. Taannalu innuttaasut akuutillugit oqallisigineqarli.

Siumumiit siunnersuuteqartumut qujalluna oqallinnissamut qilanaarpugut.

Erik Jensen, Siumut